

## E Fest ferr uns unn onnern Leit

Letzhie freidaachs sinn merr uffem Stadtfest gewese, moi Fraa unn ich, unn hawwe uns mett ooner Hond om Mitter soim Woistond unn mett de onner Hond on em Woiglas festgehalle. So e Fest iss immer e Geleechenheit, mol widder Flerschemer ze treffe, sunst triffsde se joo nor beim Aldi odder uffem Kerchhof.

Awwer mettem Treffe isses joo nit gedue, merr det joo aach gern e bisje mettenonner schwetze. Dess ging awwer nit, weil die Toreros uff de Bien hawwe so en Krach gemacht, dassde noch nit emol dene ihr Musik geheert host.

Als merr dann de Schorsch uff die Schulter gekloppt hott, weil er grad dezu kumme iss, habb ich mich erum gedreht, habb dem Kättche zugenickt und de Schorsch oogemotzt: Konnsde nit Gude sache, du Olwel?

Druff kreischter merr ins Ohr: Habb ich joo, awwer du host nix geheert. Hosde Watt in de Ohrn?

Ja, habb ich zurick gekrische, en Haufe Watt.

Moont de Schorsch, ich konnts von soine Lippe ablese: Dann machse mol eraus!

Doo habb ich de Kopp geschittelt unn erst uff moi Ohrn unn dann uff die Bien gedeut unn dess sollt haaße: Kann ich nit, weil die iss dene Musiker, unn ohne en Haufe Watt kenne die nit spille!

Mir sinn dann all e bisje weiter eweck gonge unn dort hosde dich wenigstens in de Lautstärk von Schwerheerische unnerhalle kenne. Unn iwwer was babbelt merr, wenn merr zwische em Haufe Leit stieht? Iwwer die Leit.

Stumpt mich de Schorsch: Guck doch emol doo niwwer. Wie der doo driwwe sich präsentiert - der soll sich schäme, soi Fraa iss noch gar nit so long dood.

Ich guck hie, unn doo hatt der e weiß Hos unn e bunt Hemd oo unn hatt enn Strohhut uff. Schorsch, habb ich gesacht, sei nit so streng. Vor e paar Johr sinn die Witwer noch mett de Gieskonn iwwer de Kerchhof gelaafe, mett de Zott nooch vorn. Heit gehnse uff die Feste unn lerne dort oo kenne.

Ess Kättche hott gelacht: Der brauch koo kenne ze lerne, der hott schunn oo. Die losse sich nor noch nit in de Öffentlichkeit blicke, weeche de Leit. Awwer guck derr doo unne die - wie heeßt se? - emol oo, was die ferrn korze Rock oohott unn wie die so ausgeschnitte iss, die iss doch aach nimmi so jung. Warum dere ihrn Monn die so erumlaafe lässt ...

Ich guck hie: Doo hosde recht, Kättche, dess solltse liewer de Junge iwwerlosse. Dere ihrn Monn? – der hott doch nix se redde.

Moi Fraa moont: So oo misst ihr emol hawwe, ihr det eich umgucke. Dere ihrn Monn wäscht unn biechelt, butzt die Fenster, doo det ich eich gern emol seh.

In dem Aacheblick kimmt de Hubert vorbei, dut jedem von uns die Hond gewwe unn ruft: Na ihr Hübschen, ist das nicht ein schönes Fest? Wie ich euch kenne, redet ihr wieder über die Leute, oder?

Naa, habb ich de Kopp geschittelt, iwverhaupt nit. Mir redde nie iwver die Leit. Mir heern uns die Musik oo.

Eiern Honnes